

玄奘版 歸敬偈

讚佛寶 諸破所知障翳暗 盡其所有如所有 諸法真俗理影中 妄執競興於異見
斯由永離諸分別 無垢清淨智光明 獲得最勝三菩提 惑障并習斷常住
能無功用於十方 隨諸有情意所樂 開示殊勝極廣大 三種解脫等方便
由無分別有大悲 生死涅槃俱不住 由攝妙慧巧方便 究竟至極自他利

讚法寶 如是世尊等所覺 等所開示微妙法 若能於此善修行 必獲寂然甘露迹
誹謗決定沒無底 甚久無能大苦海

讚僧寶 學無學僧居道果 普勝一切所餘僧 善逝無垢功德河 真實於中而沐浴
為世無上良福田 雖復投於微少善 而便廣大如地空 慧者由斯得解脫

歸命禮 故我至誠身語思 頻修無倒歸命禮

觀自在菩薩，行深般若波羅蜜多時，照見五蘊皆空，度一切苦厄。舍利子，色不異空，空不異色；色即是空，空即是色。受、想、行、識，亦復如是。舍利子，是諸法空相，不生不滅，不垢不淨，不增不減，是故空中無色，無受、想、行、識；無眼、耳、鼻、舌、身、意；無色、聲、香、味、觸、法；無眼界，乃至無意識界；無無明，亦無無明盡；乃至無老死，亦無老死盡。無苦、集、滅、道，無智亦無得。以無所得故，菩提薩埵，依般若波羅蜜多故，心無罣礙，無罣礙故，無有恐怖，遠離顛倒夢想，究竟涅槃。三世諸佛，依般若波羅蜜多故，得阿耨多羅三藐三菩提。故知般若波羅蜜多，是大神咒，是大明咒，是無上咒，是無等等咒，能除一切苦，真實不虛。故說般若波羅蜜多咒，即說咒曰：「揭諦、揭諦，波羅揭諦，波羅僧揭諦，菩提薩婆訶。」

— 玄奘法師譯，《般若波羅蜜多心經》

〈普賢警眾偈〉

是日已過，命亦隨滅；如少水魚，斯有何樂？

當勤精進，如救頭燃；但念無常，慎勿放逸。

— 選自《法句經》

〈普賢行願品迴向偈〉

文殊師利勇猛智，普賢慧行亦復然，我今回向諸善根，隨彼一切常修學。

三世諸佛所稱嘆，如是最勝諸大願，我今回向諸善根，為得普賢殊勝行。

— 《普賢行願品》中八句